

Kajian: Warga S'pura dapati kaum pendatang kurang usaha bersepadu dalam masyarakat

KEBANYAKAN warga Singapura secara umum memahami kepentingan dan nilai wujudnya golongan pendatang di sini, namun ramai juga berasakan golongan ini tidak melakukan secukupnya menyepadukan diri mereka di dalam masyarakat.

Demikian antara dapatan daripada kajian Institut Pengajian Dasar (IPS) mengenai bangsa, agama dan bahasa yang dibentangkan semalam.

Hampir sembilan dalam 10 (87 peratus) warga dan penduduk tetap (PR) yang ditinjau setuju bahawa "masih banyak yang harus dipelajari" mengenai budaya pendatang.

Bilangan responden yang sama (90 peratus) menyatakan bahawa adalah baik mempunyai rakyat daripada latar belakang negara berbeza hidup dalam kawasan yang sama.

Sebanyak 72 peratus responden

juga gemar bertemu dan berinteraksi bersama pendatang baru.

Namun, 67 peratus responden berkata pendatang tidak melakukan secukupnya untuk menyepadukan diri mereka di Singapura.

Zamil Kajian Kanan IPS, Dr Matthew Matthew, yang mengongsi kajian itu dalam Konvensyen Integrasi Nasional (NIC) semalam berkata:

"Penemuan mengenai bangsa dan agama memberikan latar belakang bahawa (penyepaduan) bukan sesuatu yang mudah. Malah, dalam kalangan penduduk setempat, ada perbezaan dan hal tertentu yang boleh diperbesarkan mereka," katanya.

Kajian IPS itu meninjau 4,015 warga dan PR antara Ogos tahun lepas dengan Januari tahun ini. Ia meminta pandangan mereka tentang bangsa dan agama dalam 10



hal seperti diskriminasi dan tahap keselesaan terhadap bangsa lain.

Menteri Kebudayaan, Masyarakat dan Belia, Cik Grace Fu

(gambar), yang mempengerusikan NIC, ketika berucap kepada sekitar 190 tetamu daripada kumpulan masyarakat dan persatuan pendatang, berkata:

"Menyepadukan warga tempatan dengan pendatang baru ke dalam masyarakat kita adalah satu perjalanan berterusan dan sebahagian evolusi kita sebagai negara muda."

Semalam, beliau juga mengumumkan satu kumpulan kerja baru bagi meneliti perjalanan rakyat Singapura yang melibatkan warga mendefinisikan makna menjadi warga Singapura.

Kumpulan kerja itu akan menyediakan bahan bagi menjelaskan nilai dan tanggungjawab sebagai warga Singapura, norma masyarakat dan usaha mewujudkan pemahaman budaya dan sejarah negara.